

Headline	Usaha berterusan pelihara Lembah Lenggong		
MediaTitle	Sinar Harian		
Date	04 Nov 2023	Color	Full Color
Section	Nasional	Circulation	140,000
Page No	36	Readership	420,000
Language	Malay	ArticleSize	779 cm <sup>2</sup>
Journalist	N/A	AdValue	RM 16,515
Frequency	Daily	PR Value	RM 49,545



Warisan khazanah negara diiktiraf UNESCO jadi bahan rujukan generasi akan datang

#### LENGGONG

**D**iiktiraf sebagai Tapak Warisan Dunia oleh Pertubuhan Pendidikan, Sains dan Kebudayaan Bangsa-Bangsa Bersatu (UNESCO), semestinya Lembah Lenggong dipelihara sebagai warisan arkeologi negara yang tiada tolok banding nilainya.

Pelbagai artifak sejarah ditemui di tapak yang kini diketahui kawasan tempat tinggal manusia paling awal di Semenanjung, termasuk paling signifikan, rangka manusia dari zaman batu era paleolitik, Perak Man.

Menurut Pengarah Bahagian Warisan Dunia, Jabatan Warisan Negara (JWN), Mohd Syahrin Abdullah, penjagaan dan perlindungan Lembah Lenggong untuk generasi akan datang penting sebagai bahan rujukan asal usul kerana ia berkaitan bukti kewujudan manusia terawal di negara ini dan antara yang tertua di dunia.

Beliau merujuk kepada rangka yang ditemui di Gua Gunung Runtu, Bukit Kepala Gajah, Lembah Lenggong (Hulu Perak) yang berada dalam keadaan hampir sempurna dan tertia pernah ditemui di Malaysia malah di Asia Tenggara, dianggarkan pernah hidup kira-kira 10,000 hingga 11,000 tahun lepas.

Mohd Syahrin yang menyandang jawatan itu sejak tahun 2015 berkata, pelbagai usaha dilakukan bagi meyakinkan UNESCO dalam aspek penjagaan dan melindungi Lembah Lenggong bermula dengan pengiktirafan berserta mekanisme dan pelan pengurusan.

Untuk rekod, Lembah Lenggong diiktiraf sebagai Tapak Warisan Dunia semasa mesyuarat World Heritage Committee sesi ke-36 di St Petersburg, Rusia pada 30 Jun 2012.

"Kita ada pelan pengurusan dan alhamdulillah, ia meyakinkan mereka (UNESCO) untuk pengiktirafan ini," katanya kepada Bernama.

Selain perlu memastikan status itu kekal berdasarkan dokumen rancangan pengurusan pemuliharaan (CMP) yang disediakan dan diwartakan di bawah Akta Perancangan Bandar dan Desa 1976, terdapat beberapa perkara tertakluk mengikut akta kendalian JWN.

"Kita wujudkan dokumen yang menjadi

# Usaha berterusan pelihara Lembah Lenggong

FOTO: BERNAMA



Kompleks Bukit Kepala Gajah yang meliputi Gua Kelawar, Gua Harimau dan Gua Gunung Runtu merupakan antara destinasi menarik untuk pengunjung melawat Lembah Lenggong.

puncu kuasa menyediakan tapak. Daripada dokumen itulah, kita laksanakan pemantauan, kebenaran merancang dan lain-lain.

"Seterusnya, bagi tujuan pengekalan status, kita ambil langkah berkaitan perlindungan dan pemantauan tapak termasuk memastikan kesesuaian tapak bagi kunjungan pelawat.

"JWN memasang pagar di semua gua di kawasan Lembah Lenggong dan menyediakan pelantar kayu bagi tujuan mengelak berlaku kerosakan terhadap kawasan sekitar, selain kemudahan kepada pelancong," katanya menambah, sebanyak RM25 juta dibelanjakan untuk pemeliharaan dan perlindungan Lembah Lenggong.

Statistik kedatangan pelawat ke galeri sementara, Galeri Arkeologi Lembah Lenggong bagi tahun 2023 sehingga September lepas seramai 20,840 orang.

#### Istimewa Lembah Lenggong

Menyifatkan Lembah Lenggong mempunyai keistimewaan tersendiri, Mohd Syahrin berkata, tempoh mendapatkan pengiktirafan bagi kawasan itu lebih singkat berbanding Tapak Warisan Dunia



Masjid Raja adalah sebuah bangunan bersejarah yang dibina pada tahun 1541, masih tersergam kukuh dan kini menjadi bangunan warisan tarikan pelancong di Kampung Chepor, Lenggong.

UNESCO lain sebagai contoh Bandaraya Melaka dan George Town, Pulau Pinang yang mengambil masa hampir 10 tahun.

"Usaha di Lembah Lenggong ini dimulakan pada tahun 2009 dan dalam tempoh tiga tahun, banyak perkara telah dilakukan termasuk menghantar dokumen dan sekurang-kurangnya setahun sebelum mendapat pengiktirafan perlu dihantar dosis atau dokumen pencalonan lengkap.

"Maklumat yang kita sediakan kita susun secara bersesuaian untuk digunakan bagi mendapat pengiktirafan UNESCO. Kriteria UNESCO ketat, ada 10 kriteria.

"Antaranya nilai keunggulan sejagat, jadi itu yang kita kena tengok kesesuaian dan buat dokumen bagi menyesuaikan keperluan dan kehendak UNESCO," katanya.

Katanya, Lembah Lenggong terbahagi kepada dua iaitu tapak terbuka dan tapak gua perlu dipelihara, manakala kawasannya kategori kebudayaan yang bukan sekadar melibatkan nyanyian, tarian serta persembahan tetapi atas faktor campur

tangan manusia.

Mengambil contoh ladang Teh Boh di Cameron Highlands, Pahang dan Institut Penyelidikan Perhutanan Malaysia (FRIM), beliau berkata ia sebenarnya bukan tapak semula jadi tetapi tapak kebudayaan akibat daripada aktiviti manusia.

"Untuk tapak gua atau tapak arkeologi di Lembah Lenggong, manusia menjadikan gua di sana sebagai tempat tinggal, berlindung dan tempat pengembuan.

"Bagi tapak terbuka pula, ia sebenarnya tapak arkeologi di luar gua setelah penyelidik menggesek terdapat banyak alatan batu di Lembah Lenggong.

"Kita dapat tahu populasi Lenggong ini besar. Tapak terbuka antaranya dibuktikan di Kota Tampan ini 75,000 tahun dahulu dan di Bukit Bunuh 1.83 juta tahun, ia bukti tertua di Malaysia dan antara tertua di dunia," katanya sambung menambah tapak terbuka di Lembah Lenggong unik kerana kebanyakannya tidak terjejas dek bencana seperti tanah runtuh atau banjir.



Replika rangka Perak Man atau Orang Perak yang merupakan manusia prasejarah tertua berusia 11,000 tahun yang ditemui di Gua Gunung Runtu terletak di Bukit Kepala Gajah membuktikan kewujudan manusia terawal yang tersimpan di Galeri Arkeologi Lembah Lenggong.